

7. *Qui ritus sacri introducti?*

1. S. Zephyrinus S. Eucharistiæ sumptionem tempore Paschali imperat. 2. S. Callistus quatuor temporum jejunium ex Apostolica traditione celebrari solitum, confirmat. 3. S. Urbanus sacra vasa ex argento fieri mandat. 4. Christianorum sepulchreta consecrantur. 5. Litaniarum usus in Orientis Ecclesia frequentatur. 6. S. Felix pios quosdam ritus in templorum dedicatione præscribit. 7. Eulogiæ sive panes sacri ad finem Missæ in templis distribuuntur. 8. S. Anterus Martyrum res gestas accuratè conscribendas curat. 9. publicæ, pluriumque annorum pœnæ hoc & superiore Seculo pœnitentibus irrogatæ. 10. Missæ sacrificio, quod breviori temporis spatio peractum primò fuerat, à diversis dein SS. Pontificibus variæ preces ad adjecitæ.

8. *Quinam Ordines Religiosi instituti?*

1. Vita Eremitica non tam inchoata, quàm illustrata & propagata est à S. Paulo Eremita. 2. S. Cyprianus Episcopus Carthaginensis, qui de disciplina & habitu Virginum librum scripsit, regularium Sacerdotum Congregationem instituit.

9. *Quinam Seculum hoc doctrinâ & sanctitate potissimum illustrarunt?*

Præter Tertullianum & Origenem, qui post insignes prorsus ingenii partus, Ecclesiæ bono editos, in varios tandem rapti sunt errores, scripsere Clemens Alexandrinus, Minutius Felix, S. Cyprianus Episcopus Carthaginensis, S. Gregorius Thaumaturgus Episcopus Neocæsareensis. Inter sanctos Martyres excellere Laurentius, Mauritius cum Sociis, Sebastianus, Georgius, Barbara, Cæcilia, Apollonia, Agatha &c.